

Ledscha davart il dret da vschinedi da la vschinaucha da Silvaplauna

Art. 1 Oget da la ledscha

La preschainta ledscha regla las premissas, las cumpetenzas e la procedura per l'acquist dal dret da vschinedi da Silvaplauna, confuorm a la legislaziun federela e chantunela davart il dret da vschinedi **(1)**.

Art. 2 Premissas da natüralisaziun per personas estras illa procedura ordinaria

1. A personas estras po gnir garantieu il dret da vschinedi da la vschinaucha da Silvaplauna, sch'ellas sun domiciliadas sainz'interrupziun illa vschinaucha da Silvaplauna düraunt ils ultims trais ans aunz cu inoltrer la dumanda e totelmaing düraunt tschinch ans.
2. In cas da bunas cugnuschentschas da la lingua rumauntscha **(2)** bastan duos ans da domicil sainz'interrupziun aunz cu inoltrer la dumanda.
3. Ultra da que haun ellas d'accumplir las ulteriuras premissas da natüralisaziun confuorm a la legislaziun federela e chantunela davart il dret da vschinedi.

Art. 3 Premissas da natüralisaziun per Svizras e Svizzers illa procedura ordinaria

1. A Svizras e Svizzers chi sun domicilios sainz'interrupziun daspö almain duos ans illa vschinaucha da Silvaplauna po gnir garantieu u concess il dret da vschinedi cumünel, sch'els
 - a) nu sun gnies in greiv conflict cul dret penel **(3)**
 - b) as participeschan a la vita economica u a l'acquist da furmaziun **(4)**
 - c) dispuonan da relaziuns finanzielas regledas **(5)**
 - d) nu retiran üngün'assistenza sociela ed haun restituieu l'assistenza sociela retratta düraunt ils ultims desch ans **(6)**.

Art. 4 Cumpetenzas

1. Il cussagl dals vschins decida davart la garanzia, la concessiun u la refüsa dal dret da vschinedi da la vschinaucha.
2. Il cussagl dals vschins tscherna üna cumischiun da natüralisaziun chi examinescha las dumandas da natüralisaziun in regard a l'accumplimaint

da las premissas da natüralisaziun e fo la proposta correspondententa al cussagl dals vschins.

Art. 5 Taxas

1. Per lavuors in connex cun la procedura da natüralisaziun inchascha la comunitad da vschins taxas chi cuvernan ils cuosts.
2. Per iffaunts minorens chi nu vegnan natüralisos insembel cun lur genituors, per persunas in scolaziun scu eir in cas d'occasiun spezielas paun las taxas gnir redottas u relaschedas.
3. La comunitad dals vschins po decreter disposiziuns correspondentas.

Art. 6 Cas speciels

1. In cas motivos po la comunitad dals vschins conceder u garantir il dret da vschinedi da la vschinauncha honoris causa ubain scu donaziun.

Art. 7 Objecziuns, recuors

1. Decisiuns negativas sun da motiver e da munir cun ün'indicaziun dals mezs leghels.
2. Cunter decisiuns da la comunitad dals vschins as po que recuorrer al tribunal administrativ.

Art. 8 Vigur

1. Il cussagl dals vschins determinescha l'entreda in vigur da quista ledscha zieva l'apruvaziun tres la radunanza dals vschins.
2. Cun l'entreda in vigur da quista ledscha vain abolida la ledscha davart il dret da vschinedi da la comunitad dals vschins da Silvaplauna dals 4-12-2006.

Indicaziuns e rinviaments

- (1) Ledscha federela davart il dret da vschinedi svizzer (ledscha davart il dret da vschinedi, LDB; CS 141.0)
Ordinaziun tar la ledscha davart il dret da vschinedi svizzer (ordinaziun davart il dret da vschinedi, ODB; CS 141.01)

Ledscha dal dret da vschinedi dal chantun Grischun, LDBchant; DG 130.100)

Ordinaziun tar la ledscha dal dret da vschinedi dal chantun Grischun, ODBchant; DG 130.110)

- (2) Confuorm a l'art. 13 ODBchant
- (3) Conguela l'art. 7 LDBchant e l'art. 18 ODBchant
- (4) Conguela l'art. 14 ODBchant
- (5) Conguela l'art. 15 ODBchant
- (6) Conguela l'art. 14 al. 3 ODBchant e l'art. 5 al. 1 lit. c LDBchant

Approveda da la radunanza dals vschins ils 21 lügl 2020.

Missa in vigur tres il cussagl dals vschins ils 21 lügl 2020.

Silvaplana, ils 21 lügl 2020

Il president dals vschins

L'actura